

## **MME UTOM ANDIKPEME-OBIO**

**Isaiah 62:1-7; Ezekiel 33:1-19; Mme Nke 22:6; 29:15**

**OYOHỌ UKPEP-ŃKPỌ 369**

**Eke Mkparawa**

**IKỌ IBUOT: Mbufo emi etide Jehovah nkpọ, ekutie suñ” (Isaiah 62:6).**

### **Edidiọñ**

Owo ekededi emi edide anditiene-Christ ekenyaña enye enọ ntak. Enye oyom ndibọhọ iyaresit Abasi onyuñ enem esit koro enye ebeñe idem ndika Heaven. Enye nko adara ke emem emi odude ke esit esie tọñọ nte Jesus okobiomode enye mbiomo idiọk-nkpọ. Enye onyuñ okpono ikọ Abasi ke ndinyime edifen emi Jesus ọñode. Enye odomo ndinim kpukpru mme eñwọñọ Abasi ke akpanikọ. Kpukpru emi oto ke emi enye amanade obufa.

Edi nkpọ odu ke ndidu uwem anditiene-Christ akan ndidara ke mme nkpọ emi Abasi ọñode. Ikwo kiet etiñ ete ke ediọñ nnyin man nnyin idi edidiọñ inọ mmọ efen.

**“Ediọñ mi man n’di edidiọñ**

**Enyaña mi enọ utom Ọbọñ**

**Enọ Uñwana man ‘nam utom**

**Man nda mme ukpọñ efen nsọk Enye”**

Nte isañade ikpere Jesus ntre ke inyene akwa mbiomo nditiñ nno mbio efen ite ke Jesus amama kpukpru owo onyuñ oyom ndikut nte anam-idiok ọbọhọde. Jesus edi akakan ufan nnyin, ndien esifina nnyin ndikut nte mme owo esinde Enye.

### **Edisio Isaiah Ndọñ**

Isaiah ama ama Abasi ke ofuri esit esie. Usen kiet nte enye ọbọñde akam ke Itie-ukpono, Abasi ama osio enye ọdọñ man ọkọkwọrọ ikọ ọñọ ofuri Israel, onyuñ etiñ ọñọ mme owo abaña ubierikpe emi edidide etiene mmọ edieke mmọ midikabakere esit. Isaiah ikabiatke ini ndomo kiet. Ikọñhọ mfaña ikonyuñ idọhọke Abasi ite ke imenyene mme nkpọ efen ndinam kaña. Utom Abasi ekedi nkpọ eke okponde akan ọñọ Isaiah, ukem nte ekpedide ọñọ kpukpru mmọ emi etienede Abasi ke akpanikọ.

Isaiah ama anam akpanikọ ke ndida ediwak isua ntiñ nno mme owo se mmọ ekpenamde man enem Abasi esit. Ke uwak ini mme owo ikọñhọ mkpañ utoñ. Mmọ ema eka iso enam idiok. Mmọ ikọñhọ Abasi emi Isaiah akamade ukpono. Emi ama anam esit Isaiah ọfuhọ. Enye ikekemeke ndibọ nduok-odudu ke ini emi Israel ekekade iso enam idiok enyuñ emende ubierikpe edori ke ibuot mmọ. Mbiomo esie ekedi ndikwọrọ Ikọ Abasi ye odudu man akpanam mme owo ekabare edi akwa idut, ekpenyuñ enọ Abasi ubọñ ke enyin mmọ emi mifiokke Abasi.

### **Ndiyama Nno Jesus**

Abasi oyom ikọt Esie edi edidiọñ enọ ererimbot. Enye oyom ndiyama mbe ke ikọt Esie man ọñọ ererimbot uñwana. “Abasi etie ke Zion emi eyede ama, ayama” (Psalm 50:2). “Zion” eke spirit edi kpukpru ikọt Abasi, ndien Enye oyom mmọ edi mmọ emi “eyede ama.” Edieke munyeneke ata edisana uwem uyehe uma ke enyin Abasi. Nte ererimbot ekut Jesus ke afo? Nte amayak uñwana fo ayama man mme owo efiok ete ke afo edi anditiene-Christ? Ediwak ini edinam nnyin esitiñ ikọ akan ikọ inua nnyin. Nte mme edinam fo enọ Abasi ubọñ? Bọñ akam ọkposọñ baña mme anam-idiok. Nam mkpe-ubok baña mmọ emi miduhe ke Ubom Erinyaña.

Isaiah, anditiñ ntiñ-nnim ikọ, ọdọhọ ete “mbufo emi etide Jehovah nkpọ ekutie suñ.”

## **Mme Ekpeme Obio Ke Enyoñ Ibibene**

Ke ini eset, ema esibọb ikpọ ibibene ekanare mme obio ekuk man mbon-ekọñ mme asua ekukeme ndiduk. Ama esidu ikpọ inua-otop emi ekesiberide ke ini ñkpọ-ndik edide. Ke enyoñ anyan ibibene oro, ke andikpeme-obio akada man ekeme ndikut ñkpọ ke anyan ebiet. Andikpeme-obio emi anamde akpanikọ eyesian mbio obio ke ini okutde isen owo edide. Man mmọ enyene oyọhọ ifet ndiberi inua-otop. Ndusuk ini ekpeme obio ekeme ndide idap ndien ikwe ini emi mme asua edide. Ndusuk, enye ñko ekeme ndikut nte owo edide, ndien ekere ete idighe akpan-ñkpọ, ufọn ñko inyuñ iduhe ndisian mbio obio. Nnyin imekeme ndikere ite ke mme owo ekedi ndisime sia mmọ ekefrede ndiberi mme inua-otop ke ini mmọ ema ekenyene ifiok ite ke ndiberi mmọ ekeme ndibiọñ mme asua.

Edi yak nnyin ikere nte mme owo edude ke ndue idem ke abaña asua emi okponde akan, kpa Satan. Enye ofiok ñkpọ eti eti, onyuñ odomo ke kpukpru usuñ ndinam mme owo eka hell. Ke ndusuk ini enye esinam idiok-ñkpọ etie nte eye, man oto do mkparawa ekere ete ke idiok iduhe ke nditut utọñ ye ete ye eka nnyuñ ñwọrọ ñkanam se ndiọi nditọ enamde. Esitie nte enehede ọsọñ eti eti ndusuk nditọ ndida nnọ se ifonde. Mmọ esiyom ndinam se mbio efen enamde, ke edide eti me idiok. Oro edi ntak emi mmọ eyomde andikpeme-obio nditiñ nnọ mmọ ñkpọ-ndik emi edude ke owo ndisin mme ukpẹp-ñkpọ ñwed Abasi.

Mme andikpeme-obio edi mme ete ye mme eka, mme andikpẹp ke Usen Ọbọñ, ye mme ọkwọrọ-ikọ, emi mmọ ekopde ekwọrọde ikọ ke ufọk Abasi. Ñwed Abasi etiñ ete edieke mme andikpeme-obio enamde akpanikọ ke utom mmọ ke ndisian mbio efen mbaña utip idiok-ñkpọ, ke eyekpe mmọ utip. Edieke mmọ emi ekopde mikpemeke mmọ eyebọ ufen.

Edieke ete ye eka fo enamde akpanikọ ke ndikpẹp fi mme ibet Abasi, enyuñ ekpẹpde fi ebe ke uwut ñkpọ nte anditiene-Christ okpodude uwem, edi afo esin ndikop, afo eyebọ ufen ubiom-ikpe eke okponde eti eti. “Edi ofin emi ọkọfiokde mbet ete esie, ndien mibeñeke idem, minyuñ inamke nte uduak esie etemedede, eyemia enye ediwak ubok ikpa” (Luke 12:47).

Ndusuk nditọ ekere ete edieke mme ete ye mme eka edide mme anam akpanikọ, nte ini akade iso, oro eyekabare edi erinyaña nditọñko. Abasi okpono utọ mme ete ye mme eka oro, onyuñ ọdọhọ ete, “Tim teme eyenọwọñ nte ekemde ye usuñ esie: ke ini enye akabarede idem akani owo, enye idikpọñke enye” (Mme Ñke 2:6). Edi ete ye eka mme Abasi ke idem Esie ikemeke ndifefik owo nnyaña. Owo kiet-kiet enyeme ndikabare esit ñkpọñ idiok ñkpọ esie, ndien ebeñe Jesus ete efen ọnọ imọ. Ke ini idade ke iso itie ikpe Abasi, owo kiet-kiet eyebọrọ ọnọ idem esie, ndien enye idinyeneke mfaña ndinọ edieke enye minyeneke erinyaña.

## **Ndidu Uwem Eke Idiok Ñkpọ Miduhe**

Mme andikpeme-obio emi edide Mme andikpẹp ke Usen Ọbọñ ye mme Ọkwọrọ-ikọ enyene ndinam akpanikọ ke ndikpẹp akpanikọ Abasi. Ñwed Abasi ọdọhọ ete. “kpukpru owo emi Abasi okobonde inamke idiok” (1 John 5:18), ndien eti andikpẹp ọsọñọ omum eti idaha emi, koro ata eyen Abasi inamke idiok. Ñwed Abasi etiñ ete “mbufo enyene nditọñọ ntak mmana” (John 3:7). Baba andikpẹp kiet emi edide anam akpanikọ eke editiñde inọ fi ete ke afo emekeme ndika Heaven oto koro akade ufọk Abasi ye koro odude eti uwem iduhe. Ñwed Abasi etiñ ete ke ema enyaña nnyin, imakabare idi mbufa. “Ntem edieke owo odude ke Christ, ema ebot enye obufa; ñkani ñkpọ ema ebe efep: sese, emekabare edi mbufa” (2 Ñwed Corinth 5:17). Andikpẹp emi edide anam akpanikọ eyetiñ ọnọ fi ete ke afo enyene ndikabare esit. Edieke edikabare esit miduhe ke afo, ke ini afo ekekerede ete ke imọ idi anditiene-Christ, afo udighe anditiene Jesus ke akpanikọ.

Kere baña utom kpukpru mme andikpeme-obio emi, oro edi mme ete, mme eka, mme andikpẹp, mme ọkwọrọ-ikọ, me owo eke ededi emi enyenede odudu me okoñde ke idaha akan fi. Akpana afo okpono kpukpru mmọ emi edomode ukeme ndiñwam fi ndika Heaven. “Ekop uyo mme andida mbufo usuñ, enyuñ esuk ibuot enọ mmọ; koro mmọ ekpemedede eyom ufọn ukpọñ mbufo, nte mmọ emi enyenede ndinọ Abasi ibat; man mmọ enam utom ke idara, ekunam ke mfuhọ; koro emi midorike udori inọ mbufo” (Mme Hebrew 13:17).

## **Andikpeme-obio Emi Minamke Akpanikọ**

Editie didie edieke andikpeme-obio minamke akpanikọ? Abasi ọdọhọ ete; “Ke ini ndidọhọde idiok owo, nte, idiok owo, afo udutreke ndikpa; ndien afo mutińke unọ enye, man asian idiok owo oro, ete enye ọkpọń usuń esie, enye idiok owo ama akpa ke idiok ido esie; ndien nyebup iyip esie ke ubok fo” (Ezekiel 33:8). Anam idiok idibọhọke ufen koro andikpeme-obio mikasianke enye, edi eyebiom mmọ emi etrede nditiń nnọ enye ikpe ke iso Abasi ńko.

## **Mme Anditiene-Christ**

Jesus ama ọkwọrọ ikọ ke isua ita ye ubak ke isọń mbemiso Enye ọnyọń Heaven. Enye ama ọkpọń mme anditiene Enye man etiń etop erinyańa enọ ererimbot. Ema esuan mme Ufok Abasi ke eset ke kpukpru ebiet, mmọ enyuń esańa ekwọrọ ikọ Abasi.

Ekwọrọ Eti-mbuk Jesus Christ ke isua eke ewakde ekan tosin kiet ye ikie usukkiet, edi ńwak nkan ubak kiet ke kpukpru mmọ emi edude ke ererimbot ikopke enyin Jesus. Ekeme ndidi ata ediwak mmọ emi esiońode edọń ete ekwọrọ ikọ Abasi inyeneke erinyańa eke idem mmọ, didie ndien ke mmọ editiń enọ mbio efen ebańa obufa emana? Mmọ idighe mme andikpeme-obio emi enamde akpanikọ, okposuk edi nte mmọ enyenede udọń. Esien 2000 esuk ededu emi minyeneke mme anam-utom Abasi, ye usem 1700 emi owo mikabakere baba ikọ kiet ke ikọ Abasi isin.

Kpukpru mmọ emi enyańade ekpena edi mme andikpeme-obio enọ Abasi. Ekpetie didie edieke kiet ke otu mbọhọiduń fo, me ufan fo akpadade ke iso ikpe Abasi ndien ọdọhọ ete, “Baba owo kiet iketińke inọ mi ibańa Jesus”? Owo tọsin ikiekiet emi ekpańade ke usen ke usen emi mikopke ibańa enyiń Jesus edi mbọhọiduń mme owo. Jesus akakpa man anyańa mmọ.

**“Ukpọń tọsin ikie ke usen,**

**Ke ebe efep kiet kiet**

**K’ekim y’idiok ekpọń Christ,**

**O ufok Abasi Christ, ‘etiń ‘nso**

**K’utibe usen ikpe**

**Eyebiom fi ye mmọ?”**

**Mme Isuń-utom Satan**

Mme idiok owo ke esin ifik enam utom okoneyo ye uwemeyo man eda mme ukpọń ewaha ekpọń usuń. Ke isua duopekiet ukara emi baba owo kiet minyeneke ńkpọ inọ idem esie (Communism), atara ke ńkpọ nte itiat 44 ke uniọń ye ubom oduk ererimbot ke kpukpru ntọi ńkanika kiet, ndien idahemi esin owo 950,000,000 ofin.

Nsinam idiok ọsọpde nditara ńkan eti? Edọhọ ete ke ukara emi baba owo kiet minyeneke ńkpọ inọ idem esie (Communism) esin mme owo ke ufin onyuń ada ndik enyik mme owo esuk ibuot; ke ini ukpono Abasi nte Christ etemedede anamde mme owo ebọhọ oto ke unyime esit mmọ ndisuk ibuot nnọ Christ, emi ọńode owo uwem emem ke isọń emi, adian ye nsinsi uwem. Mme anam utom ukara emi baba owo kiet minyeneke ńkpọ inọ idem esie (Communism) enam ke ndibe, ndien uwem mmọ odu ke ndik ke mmọ etrede ndinam se ekpenamde. Kpukpru oruk udori odu ọńọ anditiene-Christ; Abasi odu ke ńkań esie. Enye ayak se ifonde ikan ọńọ mme anam akpanikọ; mme Heaven esọńọ kpukpru eńwọńọ Abasi kiet-kiet. Yak nnyin idi mme andikpeme-obio emi inamde akpanikọ inọ Abasi, inyuń isuande etop emi okponde akan ke ererimbot, man otodo uwak mmọ emi etiede ke ekim ke emi ekpekut uńwana enyuń enyene nsinsi uwem!

## **MME MBUME**

- 1 Nso idi ntak emi enyañade nnyin?
- 2 Abasi ọkọdọhọ Isaiah anam nso? Isaiah ọkọbọrọ didie?
- 3 Nso ikedi ntak emi mme ekpeme obio ekesidade ke enyọñ ibibene ikpọ obio ke eset?
- 4 Siak ndusuk usuñ emi Satan adade abiaña mkparawa.
- 5 Mme anie edi mme andikpeme-obio enọ ñkpri nditọ?
- 6 Siak ndusuk ñkpọ emi mme andikpeme-obio ekpekpepe.
- 7 Nso ke Abasi edinam ye mme andikpeme-obio emi minamke akpanikọ?
- 8 Nso ke Jesus ọkọdọhọ mme mbet Esie ete enam ke Enye ama ọkọnyọñ?
- 9 Owo ifañ akananam mikopke enyiñ Jesus?
- 10 Anie editiñ ọnọ mmọ?